

CUSSEGL GROND

Sessiun da december 2023

Incumbensa Degiacomi concernent contribuziuns da manaschi e da construcziun per las mensas da las scolas professiunalas spezialisadas

Dapi il 1. da schaner 2016 è il chantun cumpetent per la finanziaziun da la construcziun e dal manaschi da las scolas professiunalas spezialisadas dal Grischun. Las scolas han ina grondezza fitg differenta. La varianza da las instituziuns da furmaziun tanscha da circa ina dunsaina d'emprendistas ed emprendists en la Scola St. Caterina a Cazas fin a la Scola professiunala artisanala Cuira (GBC) cun circa 2600 emprendistas ed emprendists en 57 professiuns. Mintga di frequentan tranter 600 e 900 emprendistas ed emprendists questa scola.

La planisaziun e l'organisaziun d'ina gronda scola professiunala spezialisada è fitg complexa. Persunas d'instrucziun, localitads ed ulteriuras resursas ston vegnir coordinadas optimalmain ina cun l'autra, e quai observond las prescripziuns da 57 ordinaziuns da furmaziun. E sche pussaivel ston las classas vegnir fusiunadas per singuls roms, per ch'i possian vegnir pussibilitads in manaschi effizient ed ina furmaziun professiunala d'alta qualitat. Per che quai reusseschia, èsi indispensabel d'er planisar mo curtas pausas da mezdi.

Tenor l'art. 30 al. 1 da la Lescha chantunala davart la furmaziun professiunala è la Regenza cumpetenta per conceder contribuziuns per construir, per endrizzar e per manar chasas da dimora, sch'igl exista in basegn per ina tala chasa da dimora. Tenor l'alineia 2 è ella er cumpetenta per conceder contribuziuns per construir e per endrizzar mensas en scolas.

En la pratica ha la Regenza empermess per la sanaziun necessaria da la mensa da la GBC mo 50 pertschient. Las expensas per il manaschi da la mensa èn vegnidas exclusas cumpletmain ed en moda consequenta. Quellas ston perquai vegnir surpigliadas sulettmain tras il purtader da scola. Quai apparentmain cuntrari a la finanziaziun da la construcziun, dals indrizs e dal manaschi da la Scola chantunala grischuna. En ina moda e maniera che n'è betg previsa legalmain e ch'è politicamain delicata vegnan uschia favurisadas singulas furmaziuns.

Pervia da la sanaziun e l'engrondiment da la Scola professiunala artisanala Cuira exista in'urgenza temporala.

La Regenza vegn incumbensada d'adattar la pratica ed eventualmain er la legislaziun executiva, per ch'i possian vegnir concedidas da medema maniera contribuziuns a la construcziun, als indrizs ed al manaschi da mensas u sumegliantas purschidas d'alimentaziun en scolas da la furmaziun professiunala, en purschidas da furmaziun cuntinuanta ed en scolas autas, sch'in basegn correspondent è cumprovà.

Cuira, ils 7 da december 2023

Degiacomi, Hohl, von Ballmoos, Altmann, Atanes, Bachmann, Biert, Binkert, Bischof, Bisculm Jörg, Bleuler-Jenny, Cahenzli-Philipp, Censi, Collenberg, Föhn, Furger, Gansner, Gartmann-Albin, Hoch, Kohler, Kreiliger, Mächler, Maissen, Mazzetta, Müller, Nicolay, Oesch, Pajic, Pfäffli, Preisig, Rageth, Rettich, Rutishauser, Spagnolatti